

何故汝之父母爲汝立名呼爲佛耶佛即答
言世所知者我能了知世所觀者我亦能觀
所得滅者我亦得滅我具一切智一切了知
我從無數劫種種修行遠塵離垢今得無上
菩提故立佛號云何世尊佛言我於因地自
審觀察所有善法戒法心法智慧法復觀貪
等不善之法能招諸有生滅等苦以無漏智
破彼煩惱得無上覺是故天人凡聖世出世
間咸皆尊重故曰世尊
佛說十號經

佛爲娑伽羅龍王所說大乘法經

宋西天三藏朝散大夫試鴻臚少卿傳教大師施護奉詔譯

如是我聞一時佛在大海中娑伽羅龍王宮
莊嚴道場與大比丘衆七千五百人俱并諸
得大智慧菩薩摩訶薩自十方世界皆來集
會復有百千俱胝那由他梵王帝釋及護世
等天龍夜叉乾闥婆阿修羅識嚧拏緊那羅
摩睺羅伽等亦來集會爾時世尊見彼一切
大衆來集會已告娑伽羅龍王言龍主觀此
世間種種行業皆從妄起種種心法當感種

種果報若彼不了當生種種之趣龍主汝當
觀此大海之衆見作種種士夫色相龍主而
彼一切色相由於一切善惡身口意業各各
之心種種變化然此心法雖云色相猶如幻
化無可取故龍主此之色相一切諸法本無
所生亦無主宰復無有我亦無礙故如是種
種所作之業諸法自性皆幻化相不可思議
龍主若有菩薩知一切法無生無滅無色無
相如實知已所作所修一切善業而無修作
所有色相及蘊處界一切生法悉無所見彼

若如實得是見已當復觀察殊妙色相龍主
殊妙色相云何觀察當觀如來身相如來身
者皆從百千俱胝那由他福德之所生故又
如是之相云何嚴持云何恭信當得如是之
相復得人間天上無老無死復得十百千他
化自在天身乃至大梵天身此由心不散亂
專注觀想瞻仰如來最妙之身實知此身一
切色相殊妙莊嚴皆從善業所集而得龍主
如汝住宮一切莊嚴亦福所生至於梵王帝
釋及護世等乃至天龍夜叉乾闥婆阿修羅

迦樓羅緊曩羅摩睺羅伽人非人等所有一切莊嚴皆福所生龍主又此大海之中所有衆生種種或有廣大或復微細多住醜陋彼一切身皆由種種心之所化龍主是故說言隨身口意業之所得龍主如是之報以業爲因業爲主宰汝當令諸衆生起智慧心所作所修隨學善業於諸邪見不作不住知彼邪見非爲究竟如是知已一切衆生當求爲師咸來供養并得天上人間歸信供養龍主而有一法能令衆生斷於一切惡趣之業云何

一法所謂觀察善法而彼善法云何觀察當觀自身我於日夜行住坐卧所興心意無不是過如是覺察令四威儀中諸不善法不得發生如是斷盡諸不善法當令善法而得具足復使一切同善衆生悉皆當得聲聞辟支五十一及菩薩等乃至無上正等正覺之位龍主云何善法我今說之所謂十善之業是爲一切根本安住是生天上人間根本安住世間出世間殊勝善法根本安住聲聞辟支佛菩薩根本安住無上正等正覺根本安住云何爲

彼根本安住所謂十善業道若能遠離殺生偷盜邪婬妄語綺語惡口兩舌乃至貪瞋邪見等若能如是遠離是爲十善業道乃是世間出世間根本安住龍主士夫補特伽羅遠離殺生獲得十種善法云何十法所謂得無畏施他一切衆生得住慈心得正行得不起一切衆生過失之念得少病樂得壽命長得種種非人而作擁護於眠睡覺寤皆悉安隱又得賢聖守護心不厭捨於睡夢中不見惡業苦惱之事自得不怖一切惡趣命終之後

得生天上龍主士夫補特伽羅遠離得如是十種善法行菩薩道得善心住善根成熟當得無上正等菩提龍主士夫補特伽羅遠離偷盜獲得十依止法云何爲十所謂大富自在得免王難得免水火賊盜冤家難得多十五眷屬善順和睦得多人愛樂不相苦惱凡所言說一切諦信得無量財寶皆悉集聚得此方他方一切稱讚於一切行處無怖無畏得他稱善名讚於智慧又得色力壽命辭辯相應於親非親心無分別不生惱害命終之後

得生天界龍主士夫補特伽羅遠離偷盜獲得如是十依止法以彼善根於諸佛法自能證知當得無上正等正覺龍主士夫補特伽羅遠離邪淫獲得四智善法云何爲四所謂降伏諸根離於散亂得世間一切稱讚復得無量營從龍主士夫補特伽羅遠離邪淫獲得如是四智善法以此善根當得無上正等正覺復證大丈夫陰藏隱密之相龍主士夫補特伽羅遠離妄語獲得天上人間八種善法云何爲八所謂得口處清淨常如青蓮華

香又得世間一切正見得天上人間一切愛樂得身口意清淨化彼一切有情令住三業清淨之行得清淨已咸皆歡喜得真實語言必誠信得過人辯所出言辭咸有方便於天上人間離諸過失龍主士夫補特伽羅遠離妄語獲得如是天上人間八種善法以彼善根獲得口業清淨誠實正行當得無上正等正覺龍主士夫補特伽羅遠離邪淫獲得三種一向之法云何三種所謂得知法者一向愛樂得一向真實復生智慧得一向爲人天

師天上人間一切信樂龍主士夫補特伽羅
遠離綺語獲得如是三種一向之法以此善
根迴向菩提得一切如來授記當證無上正
等正覺龍主士夫補特伽羅遠離惡口獲得
八種口過清淨而得八種善法云何爲八所
謂實語愛語並一依義語軟語離取語十六多人愛樂
語善語有義利語龍主士夫補特伽羅遠離
惡口獲得如是八種清淨口業以此善根迴
向菩提當來證得無上正等正覺復得最上
清淨梵音龍主士夫補特伽羅遠離兩舌當

得五種堅固云何五種堅固所謂得身堅固
當得遠離一切怖畏之難故得眷屬堅固不
爲他人之所貪故得信堅固獲得信業果報
故得法堅固獲得果證堅牢故得善友堅固
常得愛語攝受故龍主士夫補特伽羅遠離
兩舌獲得如是五種堅固以彼善根迴向菩
提當證無上正等正覺使彼一切外道魔
等咸不能破壞故龍主士夫補特伽羅遠離
貪毒獲得八種善法云何爲八所謂得貪心
消除得殺心不生得嫉妬心不生得樂生聖

族心爲聖人尊重得慈心以善業利益一切衆生得身端正得多人尊重得生於梵世龍主士夫補特伽羅遠離貪毒獲得如是八種善法以此善法迴向菩提心不退轉當證無上正等正覺龍主士夫補特伽羅遠離瞋毒當得五種勝願圓滿云何爲五十一所謂修身口意不遜諸根不亂當得一切廣大富貴圓滿得冤家降伏得一切廣大福德圓滿得受人天最上供養得一切廣大功德圓滿於最上受用心所欲者皆得圓滿如爲富貴發百千

最上勝願如願圓滿龍主士夫補特伽羅遠離瞋毒獲得如是五種圓滿以此善根迴向菩提證得無上正等正覺而爲三界之所尊故龍主士夫補特伽羅遠離邪見獲得十種功德之法云何爲十所謂得自心安善及同行善友深信因果得不爲身命作於罪業不久獲得賢聖之位得不迷善法修入天行不墮傍生及焰魔界行於聖道得最上福得離一切邪法得離身見得見一切罪性皆空得天上人間正行不闕龍主士夫補特伽羅遠

離邪見獲得如是十種功德以此善根迴向
菩提速能證了一切佛法當得無上正等正
覺龍主復次觀於十不善法微細之行多墮
地獄餓鬼畜生之趣龍主觀彼衆生若復殺
生當墮地獄畜生焰魔等界後生人間以餘
業故得二種報一者短命二者苦惱若復偷
盜當墮地獄畜生焰魔等界後生人間以餘
業故得二種報一者自居貧賤二者不得他
人財寶若復邪染當墮地獄畜生及焰魔界
後生人間以餘業故得二種報一者愚癡二

者妻不貞正若復妄語當墮地獄畜生及焰
魔界後生人間以餘業故得二種報一者言
不誠實二者人不信奉若復綺語當墮地獄
畜生及焰魔界後生人間以餘業故得二種
報一者言不真正二者所言無定若復惡口
當墮地獄畜生及焰魔界後生人間以餘業
故得二種報一者言多鬭諍二者人間不重
若復兩舌當墮地獄畜生及焰魔界後生人
間以餘業故得二種報一者得下劣眷屬二
者感親屬分離若復多貪當墮地獄畜生及

焰魔界後生人間以餘業故得二種報一者不能利益他人二者常被他人侵害若復多瞋當墮地獄畜生及焰魔界後生人間以餘業故得二種報一者心常不喜二者多不稱意若復邪見當墮地獄畜生及焰魔界後生人間以餘業故得二種報一者邪見二者懈怠龍主若有行於如是十不善法決定獲得如是果報復更別得無邊諸大苦蘊龍主若復菩薩遠離殺生修菩薩道行於布施得大富長壽及無量福得離一切他侵之怖龍主

若復菩薩遠離偷盜修菩薩道行於布施得大富貴及無量福而於一切心無憍惜證得深智諸佛所說無上法義龍主若復菩薩遠離邪染修菩薩道行於布施得大富貴獲無量福感善眷屬上父母妻男悉無惡見龍主若復菩薩遠離妄語十九修菩薩道行於布施得大富貴獲無量福當感所有語言一切善軟凡起誠願堅固不退龍主若復菩薩遠離綺語修菩薩道行於布施得大富貴獲無量福所言真實聞者信受凡有所說斷一切疑龍主

若復菩薩遠離惡口修菩薩道行於布施得大富貴獲無量福所言可取聞無背捨於諸衆中無有其過龍主若復菩薩遠離兩舌修菩薩道行於布施得大富貴獲無量福於諸眷屬心住平等愛之如一無有離散龍主若復菩薩遠離貪毒修菩薩道行於布施得大富貴獲無量福得端正身諸根具足見者愛樂心無厭捨龍主若復菩薩遠離瞋毒修菩薩道行於布施得大富貴獲無量福得於仇讎心無所起聞佛法要能生深信龍主若復

菩薩遠離邪見修菩薩道行於布施得大富貴獲無量福於三寶所而具正見常近於佛得聞妙法供養衆僧常無懈怠教化衆生令發菩提之心龍主若能修此十善之業行菩薩道初以布施而爲莊嚴果報圓滿得大富貴若以持戒而爲莊嚴果報圓滿得一切佛法願滿具足若以忍辱而爲莊嚴果報圓滿得佛菩提三十二相八十種好復得梵音具足若以精進而爲莊嚴果報圓滿當能降伏天魔外道以諸佛法而救度之若以禪定而

爲莊嚴果報圓滿當得正念清淨法行具足
若以智慧而爲莊嚴果報圓滿當得求斷一
切邪見若以大慈而爲莊嚴果報圓滿能令
一切衆生降伏一切微細煩惱若以大悲而
爲莊嚴果報圓滿當得一切衆生心無厭捨
若以大喜而爲莊嚴果報圓滿當得一切而
無散亂若以大捨而爲莊嚴果報圓滿當得
微細煩惱皆悉除滅龍主乃至以四攝法而
爲莊嚴果報圓滿當得一切衆生隨順化導
若以四念處而爲莊嚴於身受心法悉能解

了若以四正斷而爲莊嚴能使一切不善之
法皆悉斷滅得一切善法圓滿若以四神足
而爲莊嚴能得身心皆獲輕利若以五根而
爲莊嚴當得信進不退心無迷惑了諸業因
求滅煩惱若以五力而爲莊嚴當得不愚不
癡及得求斷貧窮過失若以七覺支而爲莊
嚴當得覺悟一切如實之法若以八正道而
爲莊嚴當能證得正智若以奢摩他而爲莊
嚴當得斷於一切煩惱若以尾鉢舍曩莊嚴
當得了悟一切法之智慧若以正道而爲莊

嚴當於有爲無爲一切方便悉能了知龍主
我今略說十善之法而有莊嚴至於十力四
智及十八不共之法乃至如來一切法分皆
得圓滿龍主乃至廣大解說此十善業道莊
嚴之事當令修學龍主譬如大地能與人界
一切國城聚落乃至林樹及藥草等而爲安
住又復諸業皆有種子種子既有四大而成
猶如種穀初生芽莖乃至成熟皆依於地龍
主此十善業道能爲天上人間一切有情勝
妙安住能令一切有爲無爲得智慧果報一

切聲聞及辟支佛乃至菩薩無上正等正覺
而爲安住亦復爲一切佛法根本安住龍主
我此所說汝等一切當以正心而生信解爾
時娑伽羅龍王并在會諸菩薩摩訶薩一切
聲聞及天人阿脩羅乾闥婆等一切大眾聞
佛所說歡喜奉行

佛爲娑伽羅龍王所說大乘法經